



## INFORMATIVNI BILTEN OPĆINE ILIDŽA

Ilidža • August/Septembar 2019  
• Broj 184







# „Primjedbe, mišljenja i sugestije na Nacrt Zakona o lokalnoj samoupravi“



Skupština Kantona Sarajevo je na 12. sjednici održanoj 24. jula 2019. godine donijela zaključak kojim je utvrdila Nacrt Zakona o lokalnoj samoupravi i otvorila javnu raspravu u trajanju 90 dana. Polazeći od činjenice da je riječ o Zakonu kojim se uređuju pitanja organizovanja i ostvarivanja lokalne samouprave u Kantonu Sarajevo u skladu sa Ustavom, zakonom i Evropskom poveljom o lokalnoj samoupravi, Kolegij Općinskog vijeća je na sjednici donio zaključak da se održi posebna sjednica Općinskog vijeća Ilidža sa samo jednom tačkom dnevnog reda „Primjedbe, mišljenja i sugestije na Nacrt Zakona o lokalnoj samoupravi“.

Tako je 19. septembra u Multimedijalnoj sali Općine Ilidža održana 30. redovna sjednica na kojoj su vijećnici sa zastupnicima sa područja ove općine u Skupštini Kantona Sarajevo i predstavnicima Ministarstva pravde, raspravljali o ovom nacrtu iznoseći svoje primjedbe, mišljenja i sugestije. Općina Ilidža kao jedna od lokalnih zajednica u Kantonu Sarajevo putem održavanja ovakve sjednice Općinskog vijeća želi da bude aktivni sudionik u donošenju najkvalitetnijih zakonskih rješenja kada je u pitanju funkcionisanje lokalne samouprave.

Zlatko Pilavac, član Komisije za izradu i usaglašavanje ovog Zakona u ime Općine Ilidža upoznao je vijećnike sa mišljenjem i primjedbama Općine ističući posebno član 11. nacrtu, koji ograničava pravo općinama koje nisu u sastavu Grada da samostalno upravljaju i unapređuju komunalne djelatnosti u oblastima održavanja javnih površina, prikupljanja i odvoženja čvrstog otpada i održavanja javne čistoće.

„Moram naglasiti da je Vlada usvojila tekst nacrtu zakona koji nije do kraja komisijski usaglašen. Nisu komisijski usaglašene odredbe koje se odnose na razgraničenje nadležnosti u oblasti komunalnih djelatnosti i nadležnosti Općinskog načelnika i Općinskog vijeća. Svjedoci smo nefunkcionalnosti pružanja navedenih komunalnih usluga koje su centralizirane u kantonalnim javnim preduzećima. Navedenim ustavnim odredbama propisano je da Općine koje nisu u sastavu Grada i Grad zajednički upravljaju, finansiraju i unapređuju djelatnosti i objekte nedjeljive komunalne infrastrukture, i to: vodosnabdijevanje, odvođenje i prerada otpadnih voda, održavanje javne čistoće, prikupljanje i odvoz čvrstog otpada, snabdijevanje prirodnim gasom, grijanje i organizovanje i unapređenje gradskog javnog prevoza“ rekao je Pilavac.



Načelnik Općine Ilidža prof. dr. Senaid Memić smatra da predloženi oblik o organizacionog nametanja nadležnosti u nacrtu Zakona, ne samo da nije dobro rješenje za općinu već će dalje unazaditi stanje u oblasti navedenih komunalnih djelatnosti

“Javna preduzeća koja održavaju javne površine i čistoću na javnim površinama, zbog nemogućnosti iznalaženja organizacionih rješenja, nisu pružala, niti će moći pružati građanima adekvatnu komunalnu uslugu. Obzirom da predloženi oblik organizacionog nametanja nadležnosti ne dozvoljava općinama da samostalno, upravljaju pojedinim javnim poslovima u interesu lokalnog stanovništva i što u praksi predloženo rješenje neće donijeti pozitivne rezultate niti promijeniti postojeće stanje u ovoj oblasti, mišljenja smo da ne treba prihvatiti predloženo zakonsko rješenje u ovom segmentu. Stava smo da se općine trebaju pitati o modalitetima propisivanja općinske nadležnosti te da kantonalne vlasti u predloženom zakonskom tekstu trebaju uvažavati prijedloge općina” istakao je načelnik Memić.

Zbog ograničavanja izvornih ovlasti općina koje nisu u sastavu Grada, neusklađenosti sa odredbama člana Evropske povelje o lokalnoj samoupravi i zbog činjenice da se pred-

metne komunalne djelatnosti ne mogu apriori dovesti u kontekst nedjeljive komunalne infrastrukture, Općina Ilidža stava je da javni poslovi se trebaju vršiti prije svega od strane onih vlasti koje su najbliže građanima. Prilikom prenošenja odgovornosti na neku drugu vlast, vodit će se računa o obimu i prirodi posla, kao i o zahtjevima efikasnosti i ekonomičnosti. Općinsko vijeće Ilidža ističe da se usvajanje Zakona o lokalnoj samoupravi treba uskladiti sa fazama izmjene Ustava Kantona Sarajevo i donošenja Zakona o pripadnosti javnih prihoda, te da se u oblasti komunalne infrastrukture, održavanje javnih parking prostora, javnih garaža, održavanje javnih površina, održavanje čistoće na javnim površinama, prikupljanje i odvoz komunalnog otpada ne treba dijeliti sa Gradom i drugim općinama, tako da općina Ilidža ne može prihvatiti predloženi nacrt Zakona obzirom da postojeći oblik obavljanja spornih komunalnih djelatnosti u centraliziranom obliku do sada nije dao adekvatne rezultate niti može ispuniti očekivanja građana. Tako je na sjednici Vijeća jednoglasno donesena odluka da se ovlašćuje Kollegij vijeća da prikupi sve primjedbe i sugestije i mišljenja, te ih uputi prema nosiocu izrade Zakona.







# Održana 29. sjednica Općinskog vijeća



Općinsko vijeće Ilidža na 29. redovnoj sjednici održanoj 29. avgusta 2019. godine usvojilo Izvještaj o izvršenju budžeta općine Ilidža za period 1. januar - 30. juni 2019. godine i Periodični finansijski izvještaj za isti period. U izvještajnom periodu ostvareni su ukupni prihodi i primici u iznosu od 16.966.391,32 KM, a ukupno ostvareni rashodi i izdaci iznose 12.035.407,64 KM. Razlika između ostvarenih prihoda i primitaka i rashoda i izdataka je 4.930.983,68 KM i prenosi se u budžet za naredni period.

Vijeće je na sjednici donijelo Odluku o uslovima i načinu držanja kućnih ljubimaca, pasa i domaćih mački, načinu postupanja s napuštenim i izgubljenim životinjama na području općine Ilidža. Ovom odlukom se uređuju minimalni uslovi i način držanja kućnih ljubimaca, registracija, uslovi kretanja koje im njihovi imaoци moraju osigurati, način kontrole njihovog razmnožavanja, te način postupanja s napuštenim i izgubljenim životinjama na području općine Ilidža, a sve u cilju očuvanja zdravlja ljudi i životinja, te sigurnosti građana i imovine. Na sjednici je donesena i Odluka o izmjeni i dopuni Odluke o priznanjima Općine Ilidža a koja se odnosi na propisani period u kojem je pripadnik oružanih snaga stupio u pripremu i odbranu zemlje i dokazom o tim činjenicama i izradi Pravilnika o načinu izbora kandidata za dodjelu priznanja Općine Ilidža. Polazeći od toga, navedena tačka je izmjenjena tako da je precizirano da je to u bilo kojem periodu od 18.09.1991 do 31.12.1991. godine.

Vijeće donijelo Odluku o izmjenama i dopunama odluke o osnivanju stalnih radnih tijela Općinskog vijeća Ilidža u smislu da Komisija za sigurnost bude stalno radno tijelo. Ovom Odlukom su sad navedene sve nadležnosti komisija kao i izvršene neke tehničke korekcije a sve s ciljem da se normativno urede sva radna tijela Vijeća i njihove nadležnosti.

Na sjednici je donesena Odluka o poništenju Odluke o objavljivanju i Odluka o ponovnom objavljivanju javnog oglasa za imenovanje četiri člana Općinske izborne komisije Ilidža. Vijeće je utvrdilo Odluke o Pravobranilaštvu Općine Ilidža - Drugi prečišćeni tekst u kojem su sadržane odredbe: Odluke o pravobranilaštvu Općine Ilidža, Odluke o izmjenama i dopunama Odluke o pravobranilaštvu Općine Ilidža i Odluke o izmjenama Odluke o pravobranilaštvu Općine Ilidža. Vijeće je usvojilo Izvještaj Radnog tijela za realizaciju zaključaka sa tematske sjednice Vijeća vezano za pružanje komunalnih usluga na području općine Ilidža u oblasti vodovoda, kanalizacije, gradskog prevoza, komunalnog otpada čišćenja javnih površina uz zaključak: Da se imenuje još jedan član radnog ovog tijela i to predstavnika Službe za inspeksijski nadzor, te da Ministarstvo pravde i uprave KS Općinskom vijeću dostavi informaciju da li je Komisija koju su činili predstavnici jedinica lokalne samouprave za usaglašavanje teksta Nacrta Zakona o lokalnoj samoupravi prihvatila primjedbe koje su se odnosile na komunalnu problematiku. Vijeće je usvojilo i Izvještaj o radu i finansijskom



poslovanju JU KSR Hrasnica-Ilidža za 2018. godinu uz preporuke-mišljenja Službe za finansije, Službe za obrazovanje, kulturu, sport i informisanje i mišljenje Pravobranilaštva Općine Ilidža. Općinsko vijeće je na sjednici primilo k znanju i Informaciju o uspostavi adresnog registra Općine Ilidža, Informaciju o utrošku sredstava i realizaciji poslovnih ideja

na osnovu javnog poziva za finansiranje i sufinansiranje najboljih poslovnih planova sredstvima budžeta Općine Ilidža namijenjenih razvoju poduzetničke inicijative mladih sa područja općine Ilidža i Informaciju o realizaciji donesenih zaključaka Općinskog vijeća Ilidža za period januar-juni 2019. godine.

## Otvoren most kod OBI-ja



**I**zgradnja pješačkog mosta kod OBI-ja je završena. Riječ je o pješačkom mostu namijenjenom povezivanju dviju obala, tačnije jednog dijela Ilidže i industrijske zone.

Iako u blizini postoji most za pješake i vozila, on godinama nije pogodan za građane koji žele pristupiti industrijskoj zoni.

Izvođač radova je bila firma Porobić d.o.o, a podizvođač je Pont d.o.o.

Nadzor je vršila firma In, a radove je finansirala Općina Ilidža.

Vrijednost ovog projekta je 1.379.823,15 KM. Ukupna dužina mosta je 92,65, a širina mosta je promjenjiva i kreće se od 5,26 do 5,30 metra.

Pješački most je projektovan kao kombinovani sistem. Uvođenjem konstruktivnih elemenata ostvarena je ideja spajanja stare ideje rimskog mosta sa novim idejama i principima gradnje i oblikovanje mosta. U zoni ograde postavljena je led linijske rasvjete, te led reflektora, kao i osvjjetljenje ispod i iznad konstrukcije. Presjecanjem vrpce načelnik Općine Ilidža prof.dr. Senaid Memić, vijećnik Općinskog vijeća Fadil Lokvančić,

Fikret Stambolić uposlenik Općine, te direktor firme "Pont" Adis Saničić su 27. septembra ozvaničili završetak radova, te svečano otvorili novoizgrađeni most.







# Delegacija Općine Ilidža u posjeti opštinama Gusinje, Rožaje i Petnica



**D**elegacija Općine Ilidža, predvođena načelnikom prof.dr. Senaidom Memićem boravila je 5. i 6. septembra 2019. u službenoj posjeti opštinama Gusinje, Rožaje i Petnica u Crnoj Gori.

Veze između naroda ove tri opštine i Općine Ilidža su tradicionalno snažne i odolijevaju vremenu već decenijama. Potpivanje sporazuma o zajedničkoj saradnji je samo dodatno produbio već prijateljske odnose između naroda sa ovih

područja, a posebno predstavlja važan iskorak radi građana triju opština Crne Gore koji su svoj dom pronašli u Bosni i Hercegovini, i to na području općine Ilidža.

Prvobitni cilj posjete prijateljskim opštinama Crne Gore je sagledavanje problema sa kojima se susreću, a u kojima im Općina Ilidža može pomoći. Polazeći isključivo od ideje jednakosti i istinske solidarnosti među narodima, ove tri opštine i Ilidže, a sve u cilju stvaranja uvjeta i razmjene iskustva dobre prakse cjelokupnog aparata javne uprave, rasta malih i opstanka velikih preduzeća, te njihovu saradnju, unapređenje i kvalitetnu promociju turizma i naše kulturne baštine – na lokalnom nivou, kao i stvaranje uvjeta za veće investicije, organizirana je i posjeta ovim opštinama.

Tokom posjete Opštini Rožaje uslijedilo je i potpisivanje “Sporazum o zajedničkoj saradnji” koji će ojačati tradicionalno dobrou saradnju između Rožaja i Ilidže, te da će otvoriti mogućnosti za razmijenu iskustava i primjere dobre prakse. Tako su 5. septembra načelnik Općine Ilidža prof.dr. Senaid Memić i načelnik opštine Rožaje Ejup Nurković, potpisali u Rožajama “Sporazum o saradnji” u prisustvu delegacija koje su činili predstavnici dvije lokalne samouprave. Na sastanku, koji je prethodio potpisivanju Sporazuma, zaključeno je da će čin potpisivanja sprazuma ojačati tradicionalno dobrou saradnju između Rožaja i Ilidže,

Prilikom posjete opštini Gusinje, predsjednica Opštine Anela Čekić upriličila je sastanak na kojem je upoznala goste sa trenutnim stanjem u Gusinju, dok je načelnik Općine Ilidža prof.dr. Senaid Memić predstavio potencijale općine, ističući da je Ilidža sa svojim brojnim investicijskim projektima, lokalna samouprava, koja je trenutno četvrta po razvoju u Federaciji BiH, ali da je treba dovesti na sam vrh tabela najboljih općina. Prema riječima načelnika Memića dosadašnji pozitivni pomaci koje je općina postigla i koje tek







treba poduzeti kako bi se učvrstio put koji vodi prema investicijama, zasigurno će dovesti Ilidžu na sami vrh najboljih općina u BiH. Dogovoreno je da delegacija ove opštine posjeti i Općinu Ilidžu, gdje bi se razgovaralo o konkretnim vidovima saradnje iz oblasti privrede, sporta i kulture.

Opština Petnjica i njen predsjednik Opštine Samir Agović ugostili su 6. septembra delegaciju Općine Ilidža, koja je prijatno iznenađena iskustvom ove mlade opštine gdje je rukovodstvo pokazalo visok nivo odgovornosti koje imaju, te su svojim inicijativama ostvarili zajedničku realizaciju značajnih projekata sa Vladom Crne Gore.

U Petnjici je potpisan Sporazum o međusobnoj saradnji, kojim će ove dvije lokalne zajednice razmijenjivati informacije, iskustva iz različitih područja djelovati i kroz zajedničke projekte te sagledati iskustva iz oblasti evropskih integracija, sa naglaskom na jačanje posvećenosti i uloge lokalnih zajednica na osnovama izgrađene prakse, u duhu i standardima metodologije zemalja EU. U okviru svojih mogućnosti ove dvije lokalne zajednice radit će na jačanju svih grana



privrede sa posebnom akcentom na turizam kao jednu od grana. Saradnja će se odnositi i na produbljivanje veza iz oblasti sporta i kulture.

Delegacija je posjetila Fabriku proizvodnje košulja "BIHOR" gdje su s rukovodstvom obišli postrojenje i čestitali na uspješnom poslovanju.

Prema riječima načelnika Memića kako je u doba globalizacije i internacionalizacije, posve neizbježan napredak u domenu obrazovanja, poljoprivrede, turizma i sporta, a sve predstavlja imperativ, te je do sada mnogo propušteno i nužno je novim potezima saradnje učiniti da ona bude bolja, vidljivija, korisnija i poticajnija BiH je matica za mnoge krajeve u bivšoj Jugoslaviji što nije adekvatno tretirano i na tom putu mora se više raditi.

Delegacija Općine Ilidža posjetila je prije dvije godine četiri općine u Srbiji, a ove godine tri u Crnoj Gori. Želja je da se uspostavi još bolja saradnja u sa općinama u FBiH i Republici Srpskoj kako bi primjere dobre prakse primjenila i u svom radu.

## Otvorena Vrtlarska kuća

**R**ekonstrukcija, sanacija, restauracija, te dogradnja Vrtlarske kuće u ulici Hrasnička cesta je završena. Svečanim presijecanjem vrpce završetak radova ozvaničio je 25. septembra 2019 godine načelnik Općine Ilidža prof. dr. Senaid Memić, pomoćnik načelnika za investicije i razvoj Mirsad Čaušević, te direktor firme "Neimari" Ramiz Mulaomerović, koja je bila i izvođač radova. Za ovu namjenu iz budžeta Općine Ilidža izdvojeno je 659.420,97 KM.

"Objekat u parku pored Hrasničke ceste je vlasništvo Općine Ilidža. Nakon sagledavanja njegovog konstruktivnog stanja i funkcionalnih mogućnosti, obezbjedili smo budžetskih sredstava i pokrenuli proceduru rekonstrukcije, restauracije i sanacije u cilju njegovog očuvanja i stavljanja u funkciju. Predhodno je izrađena projektno tehnička dokumentacija, a potom nakon usvajanja Budžeta Općine Ilidža, kojim su obezbijedjena sredstva za rekonstrukciju objekta, provedena je procedura javne nabavke, izbora izvođača radova i nadzora nad izvođenjem i u konačnici se pristupilo realizaciji projekta. Objekat nije nacionalni spomenik već je dio zaštićenog obuhvata spomenika prirode "Vrelo Bosne". U sastavu je zelene površine nekadašnjeg kompleksa "Banja - Ilidža", koji uz ekološku, dendrološku, kulturno-historijsku, estetsku, te prostorno-pejzažnu i ambijentalnu vrijednost, skupa

sa arhitektonskim objektima - hotelima izgrađenim u austrougarskom periodu, ima značaj dobra integralne baštine. U postupku izdavanja odobrenja za građenje pribavljena saglasnost na Glavni projekat od strane Kantonalnog zavoda za zaštitu kulturno-historijskog i prirodnog naslijeđa Sarajevo. Objekat od 1995. godine nije bio u funkciji i nije bio useljen. Obzirom da je restauracijom iz stambenog pretvoren u poslovni objekat, njegova konačna funkcija će biti utvrđena nakon provedene javne nabavke za odabir krajnjeg korisnika" izjavio je načelnik Općine Ilidža prof. dr. Senaid Memić.







# Festival narodne muzike “Ilidža 2019”



**F**estival “Ilidža 2019.” uz velikane narodne muzike još jednom je potvrdio da je uistinu najreprezentativniji. Najstariji i najznačajniji festival narodne muzike u regionu publici je u tri noći ponudio izuzetno kvalitetan sadržaj. Prvu noć festivala nastupali su najbolji harmonikaši iz BiH i regije. Odlukom stručnog žirija pobjednik na Festivalu narodne muzike “Ilidža 2019.” - “Prva harmonika festival” je Radovan Ivanović iz Banje Luke.

Đorđe Petrović, Vedad Husomanović, Radovan Ivanović, Ermin Pehlić, Darko Mrdić, Damjan Jovanović, Aleksandar Grujić, Jelena Petrović 1. augusta predstavili svojim najboljim izvedbama. Ali po odluci stručnog žirija Ivanović je bio najbolji.

Druga noć, 2. augusta 2019. održana je takmičarska noć u kojoj je za apsolutnog pobjednika proglašen Asmir Muhadžer iz Sjenice koji je pjevao pjesmu “Jabuka” autora Izudina Bihorca. Za istu je muziku i aranžman uradio Ahmet Šabić.

Halid Hajduković dobio je nagradu za najbolji aranžman. Mujo Hodžić je nagrađen u dvije kategorije. Pripala mu je nagrada za najbolji tekst i najbolju muziku za kompoziciju “Rano moja nepreboljena”. Sadik Hasanović proglašen je za najboljeg izvođača, a pjevao je pjesmu “Suzu” koju potpisuju Vladimir Mitrović, Slavko Stefanović i Mirza Balić. Namik Husnić je bio favorit publike. U takmičarskoj večeri predstavio se pjesmom “Lijepa kao Hercegovina” koju su uradili Nardin Mašić i Semir Čehić. Festival “Ilidža 2019.” završen je uz velikane narodne muzike iz BiH i susjednih država. Program je otvorio Zijad Sipović koji je zapjevao “Salko i fijaker”. Dok je on to pjevao ispred velike scene je prošao fijaker. Načelnik Općine Ilidža prof. dr. Senaid Memić poželio je dobrodošlicu na Festival, ističući nadu da će se još dugo godina sa Ljetne pozornice slati samo poruke ljubavi i lijepih emocija uz taktove koji će se pamti dugo.







Armin Šaković, Slađana Mandić, Osman Hadžić, Merima Njegomir, Snežana Đurišić, Branka Sovrlić, Jasna Gospić, Hanka Paldum, Merima Njegomir, Jasna Kočijašević, Ferid Avdić, Semir Cerić Koke, Asim Brkan, Nedeljko Bilkić, Ljubica Berak, Sejo Pitić, Ramiza Milkunić, Mustafa Šantić i Hamza Šantić, Ana Bekuta, Hanka Paldum, Eldin i Sejo Huseinbegović, Nikolina Kovač i Memnun Muzaferija... izvođači su koji su se pojavili na velikoj Ljetnoj pozornici.

Hanka Paldum je premijerno izvela svoju novu pjesmu „Jedna si jedina“ posevećenu njenoj najvećoj ljubavi -

domovini, autora Milića Vukašinovića koju je kraljica bh. estrade snimila u saradnji sa Hayat televizijom. Njema pjesma izazvala je oduševljenje među hiljadama prisutnih, a u jednom trenutku, u publici se zavijorila velika zastava Bosne i Hercegovine.

Novu pjesmu promoviro je i Memnun Muzaferija, pobjednik posljednje sezone showa „Zvijezda možeš biti ti“.

Na kraju revijalne večeri - istinski muzički spektakl. Na velikoj ljetnoj pozornici svoj solistički koncert održala je Ana Bekuta čiji je početak karijere vezan upravo za ovaj festival.







## Delegacija Općine Tržič u posjeti Općini Ilidža

Općina Tržič nalazi se na sjeveru Slovenije, na granici sa Austrijom usred alpskog planinskog masiva. Delegacija ove općine predvođena načelnikom Borutom Sajovicem posjetila je 26. septembra 2019. godine Općinu Ilidža. Domaćin, načelnik prof. dr. Senaid Memić upoznao ih je sa infrastrukturom i potencijalima ove lokalne zajednice. Prema njegovim riječima ono na šta je posebno ponosan jeste da je Ilidža četvrta općina po razvijenosti, te da ima oko 8000 školaraca u ovoj općini. Općinski budžet je planiran po mjeri građana i izdvajaju se velika sredstva kako za stvaranje ambijenta za potencijalna ulaganja, tako i za stipendije.

“Općina Ilidža daje 664 stipendije a izdvajamo godišnje za te namjene više od 540.000 KM. Najveći potencijal ove općine su dobri i vrijedni ljudi, a mi kao administracija spremni smo na sve vidove saradnje sa svim dobronamjernim ljudima koji to žele. Nadam se da ćemo stvoriti dobru saradnju i da ćemo nastaviti sa susretima za dobrobit dvije lokalne zajednice. Osjećajte se sigurno i slobodno kao u svakom gradu Evrope, jer mi i jesmo Evropa. Nadam se da ćete ponijeti dobre utiske iz naše općine i da ćete nam ponovo doći” izjavio je načelnik Memić.

Načelnik Sajovic predstavio je svoju općinu, istakavši da se nada da će se susreti nastaviti i jačati veze.



## Podijeljeno 660 ruksaka sa školskim priborom prvačićima

Ove kao i proteklih godina početak školske godine za prvačiće ilidžanskih osnovnih škola svečano je obilježeno 3. septembra u Kulturno sportskom centru “Sabit Hadžiić” na Ilidži U 12 osnovnih škola na području općine Ilidža u prvi razred upisano je 660 prvačića. Općina Ilidža darovala je anatomske ruksake sa školskim priborom svim budućim đacima. Za nabavku ruksaka Općina je izdvojila 40.000 KM.

“Dragi prvačići, zvuk školskog zvona je uveo vaše djetinjstvo u novu etapu odrastanja. Ove godine ćete prvi put ući u učionice, upoznati svoje učitelje i nove drugare. Također radovat ćete se prvim naučenim slovima i brojevima, kao i prvim golovima na školskom igralištu ili svome najljepšem crtežu. Vama roditeljima kao i učiteljima želim puno strpljenja, ljubavi i znam da će Ilidža biti bogatija za još 660 budućih đaka koji gdje god da odu bit će ponosni, hrabri i pametni i predstavljat će tako i svoju općinu i državu u najboljem svijetlu. Želim prije svega, da izrastete u dobre ljude. Sretno vam svima” rekao je načelnik Općine Ilidža prof.dr. Senaid Memić u svom obraćanju.

U programu za prvačiće učestvovali su učenici Osnovne muzičke škole sa Ilidže i Mirsad Abdagić Kike.

## Sajam agronomije na Ilidži

Poljoprivredno - prehrambeni fakultet Univerziteta u Sarajevu i Poljoprivredni fakultet Univerziteta Ege (Izmir, Turska), u saradnji sa “Društvom za medicinski i biološki inženjering BiH” i Poljoprivrednim fakultetom, Univerziteta u Beogradu organizovao je 30-u jubilarnu Internacionalnu naučno - stručnu konferenciju poljoprivrede i prehrambene industrije pod nazivom “Smart agriculture systems, answers for forthcoming challenges”. Općina Ilidža je podržala ovu konferenciju koja se održala u hotelu Hills. Svoja izlaganja na konferenciji 26. i 27. septembra 2019. imali su neki od najpoznatijih svjetskih stručnjaka iz Njemačke, Španije, Italije, Turske, Srbije, Hrvatske, Slovenije, Makedonije. Fokus konferencije je na predstavljanju novih tehnologija u poljoprivredi i prehrambenoj tehnologiji koje značajno usavršavaju ovaj sektor čime se postižu bolji prinosi uz minimum korišćenja

prirodnih resursa. Jedino primenom novih tehnologija u proizvodnji hrane može se adekvatno odgovoriti izazovima sadašnjice - sve većim potrebama za hranom i smanjenom količinom dostupnih prirodnih resursa. Sajam je otvorio načelnik Općine Ilidža prof. dr. Senaid Memić.







## U toku asfaltiranje 14 ulica, a izdvojeno iz budžeta 1.139,630,04 KM

**N**a području općine Ilidža u toku je rekonstrukcija 14 ulica. Za te namjene Općina je izdvojila 1.139,630,04 KM. Završeno je asfaltiranje četiri, a u toku su radovi u deset ulica.

Završena je rekonstrukcija ulice Reisa ef. Hadžiomerovića u dužini od 90 i širini šest metara. Investitor je Općina Ilidža, a za izvođača radova izabran je konzorcij firmi Sarajevoputevi d.d. Vrijednost radova iznosi 26.998,14 KM.

Urađena je i rekonstrukcija dijela ulice Zoranovići dužine 300 metara i širine tri i po metra. Izvođač radova je firma Sarajevoputevi d.d. Sarajevo. Investitor je Općina Ilidža. Vrijednost radova iznosi 30.074,73 KM.

Završeni su radovi asfaltiranja u ulici Nikole Šopa u dužini 90 metara i širini četiri metra. Općina Ilidža je radove povjerila konzorcij firmi Sarajevoputevi d.d. Sarajevo. Vrijednost radova 8.984,38 KM.

Novi asfalt je i u ulici 14.septembar u dužini 65 metara i širini tri metra. Izvođač radova Sarajevoputevi d.d. Sarajevo. Vrijednost radova iznosi 6.361,76 KM. Investitor je Općina Ilidža.

Općina Ilidža je finansirala asfaltiranje ulica u omjeru 70 posto, a građani 30 posto, i to pet ulica u kojima se obavljaju radovi.

Novi asfalt se radi u ulici Stari drum u dužini 270 metara i širine šest metara. Općina Ilidža finansira ove radove koje izvođa konzorcij firmi Sarajevoputevi d.d. Sarajevo. Vrijednost radova 69.696,90 KM.

U toku je asfaltiranje ulice Orlovača u dužini od 658 metara i širini tri i po metra. Izvođač radova je firma Braća Mujić d.o.o. Investitor je Općina Ilidža 70 posto i 30 posto građani. Investicija je vrijedna 72.071,59 KM.

U toku je rekonstrukcija ulice Kakrinjski put ( od ergele do 198D ) u dužini 625 metara i širini tri i po metra. Investitor je Općina Ilidža 70 posto i 30 posto građani. Izvođač radova konzorcij firmi Braća Mujić d.o.o. Vrijednost radova je 57.958,69 KM.

Radi se i asfalt u ulici Bistrički put od broja 173 do 181 u dužini 255 metara i širini četiri metra. Radove je finansirala 70 posto Općina Ilidža i 30 posto građani. Za izvođača radova odabrana je firma Braća Mujić d.o.o. Vrijednost radova iznosi 27.926,78 KM.



U toku je rekonstrukcija ulice Bistrički put od broja 173 do broja 213, i to u dužini 300 metara i širini 3,5 metra. Izvođač radova je firma Braća Mujić d.o.o. Vrijednost radova: 33.677,47 KM.

Novi asfalt dobit će i stanovnici ulice Most spasa od broja 52 do 56 u dužini 47 metara i četiri metra širine. Općina Ilidža je 70 posto investitor, a 30 posto građani. Radovi su povjereni firmi Braća Mujić d.o.o., vrijednost radova je 5.253,65 KM.

Novi asfalt se radi u ulici 14.septembar u dužini 175 metara i širine tri metra. Investitor je Općina Ilidža, a vrijednost radova je 21.761,98 KM. Izvođač radova je firma Sarajevoputevi d.d. Sarajevo.

U toku je rekonstrukcija u ulici 13.juni i to na dužini od 425 metara i širini od tri metra. Općina Ilidža je za ove radove izdvojila 197.145,00 KM, a izvođač radova konzorcij firmi GP ING d.o.o.

Asfaltira se i ulica Trg Oteškog bataljona dužine 370 metara i širine šest metara. Izvođač radova je firma GP ING d.o.o. Investitor je Općina Ilidža koja je finansirala radove u vrijednosti od 220.188,97 KM.

Izgradnja pješačke staze vrši se u ulici Plantaže u dužini od 790 metara i 1,5 metra. Izvođač radova konzorcij firmi Demus d.o.o. Investitor radova je Općina Ilidža, a izdvojeno je za radove pješačke staze 361.530,00 KM.

## Lakše do željenog posla

**P**olaznice i polaznici 14. generacije obuke za mlade lidere/ice UMID- Uči, misli, djeluj! Na desetom modulu koji je ujedno i posljednji, obrađivali su temu "Traženje posla". Modul je održan u Obrazovno-raznodnom centru za mlade Spajalica na Ilidži, u periodu od 5. do 7. septembra 2019. godine. Nekoliko polaznika/ca su već imali radana iskustva ili su imali priliku tražiti posao i njima je ovaj modul poslužio kako bi uvidjeli da li su pravili grške tokom traženja posla, odnosno šta su radili dobro, a ostali su imali priliku upoznati se sa izazovima tržišta rada. Polaznici/ce su na modulu učili kako napisati CV, motivaciono pismo, te kako se ponašati na razgovoru za posao. Pored toga dobili su bazične informacije kakvo je stanje na tržištu rada u Bosni i Hercegovini, šta poslodavci traže, koji poslovi su najtraženiji, kako stoje statistički podaci. Zahvaljujući tome polaznice i polaznici su analizirali svoj trenutni položaj na tržištu rada, svoje želje i htjenja, te vještine na kojima moraju poraditi kako bi došli do željenog posla.

„Kao praktikantica Instituta za razvoj mladih Kult imala sam priliku prisustvovati posljednjem modulu UMID-a. Tema je bila izuzetno zanimljiva i korisna iako sam se do sada već susretala sa svim što ide uz traženje posla. Posjedujem neko iskustvo u ovoj oblasti, ali savjeti koje smo dobili na modulu će mi uveliko olakšati traženje posla u budućnosti, te pomoći da

se na najbolji način predstavim budućem poslodavcu“, ističe Sumeja Huseinović, praktikantica Instituta za mlade Kult. S obzirom da je moj dolazak na modul i prvi susret sa polaznicima UMID-a, iskreno mogu reći da sam ostala ugodno iznenađena načinom na koji su me ugostili. Tokom modula provodili smo zajedno vrijeme, družili se i razmjenjivali iskustva. Drago mi je što sam bila dijelom te priče i nadam se da će se poznanstva koje sam stekla razvijati u budućnosti“, rekla je Sumeja Huseinović.








## Ne zaboravimo Kerima Džafića

**N**a lokalitetu Vrhovi na planini Igman 17. septembra 2019 okupili su se pripadnici Četvrtе viteške brigade kako bi obilježili 27. godišnjicu pogibije komandanta Prvog motorizovanog bataljona Četvrtе viteške brigade, brigadira Kerima Džafića.

Svojim prisustvom oko stotinjak školaraca, ali i pripadnika boračke populacije uveličalo je pomen na lik i djelo prvog poginulog oficira Četvrtе viteške motorizovane brigade. Učenjem Fatihe, minutom šutnje i na drugi prikladan način odata je počast komandatu Džafiću, ali i svim šehidima Armije Republike Bosne i Hercegovine. Održan je i historijski čas kojim su učenici ali i svi prisutni naučili više o dešavanjima u zoni odgovornosti ovog bataljona. Položeno je cvijeće i proučena Fatiha na šehidskom mezarju Kovači-Hrasnica.

Poruka sa ovog događaja je da se ne smiju zaboraviti sinovi Bosne i Hercegovine, koji su dali živote, kao i agresija 1992-1995. Samo znanjem i obrazovanjem mogu se pobijediti u budućnosti nedobronamjerni ljudi. Svečana akademija uz prigodan kulturno-umjetnički program održana je



## Obilježeno 27. godina Bitke za Famos

**U** naselju Lasica u Hrasnici 4. augusta 2019. godine obilježena je 27. godišnjica "Bitke za Famos" u kojoj je poginulo 27 pripadnika 104. motorizovane brigade Armije RBiH. Delegacije Općine Ilidža, Udruženja 104. Viteške brigade, članovi porodica šehida i poginulih boraca položile su cvijeće kod spomen-ploče u Lasnici i ispred spomen-obilježja u Hrasnici. Bitka za Famos je jedna od najvažnijih bitaka koje su se desile 1992. godine.

"Današnji datum je u najmanju ruku tužan, on je bolan, težak ali i prkosan. Obavezuje nas da pamtimo, da se sjećamo da nikad ne zaboravimo, jer zaborav je posljednja etapa zločina. Na današnji dan se branila Bosna. Branilo se sve bosansko i treba biti urezan u pamćenje i isticati na svakom mjestu da su najbolji sinovi ove zemlje dali život i nikad ih ne zaboravimo" rekao je u svom obraćanju načelnik Općine Ilidža prof.dr. Senaid Memić.

General Fikret Prevljak, komandant Četvrtе viteške brigade, podsjetio je da su za današnju slobodu za našu djecu "gazije" dale svoj život.

"Veličajmo ih, ne zaboravimo njihove podvige. Svi mi prisutni živimo s bolom navikli na naše breme, naučili da nosimo prazninu zbog onih koje smo izgubili i ljubomorno čuvamo uspomenu na njih", dodao je između ostalog Prevljak.

Potom su delegacije položile cvijeće na spomen obilježje ispred Doma kulture u Hrasnici, obišle mezarje Kovači-Hrasnica položile cvijeće, a proučen je i jasin.

Preživjeli učesnici bitke za Famos, kao i članovi porodica poginulih, ističu da je to bila jedna od najtežih bitaka za odbranu Bosne i Hercegovine i Sarajeva. Naglašavaju njen ključni značaj, jer je onemogućeno srpskim snagama da prodru na slobodnu hrasničku teritoriju, te krenu dalje ka Sarajevu.

## Obilježena godišnjica MUP-a Republike BiH

**U** druženje veterani MUP-a Republike BiH 1991-1995. Općine Ilidža 18. septembra 2019. obilježili su godišnjicu svog postojanja, a ujedno i 28. godišnjicu mobilizacije rezervnog sastava policije RBiH koji se desio 18. septembra 1991. Tim povodom delegacije su položili cvijeće na centralno spomen-obilježje ispred zgrade Općine Ilidža i proučili Fatihu, te odali počast svim poginulim. S ovog skupa poručeno je da zasluge onih koji su dali živote za BiH ne smiju biti zaboravljene, a ni njihove porodice. BiH je domovina svih njenih naroda i Srba i Hrvata i Bošnjaka i takva će i ostati.







## Isplaćeno za 192 porodilje jednokratna novčana pomoć za rođenje djeteta

Općina Ilidža je isplatila za 192 porodilje jednokratnu novčanu pomoć za rođenje djeteta. Za te namjene iz budžeta je izdvojeno 38.400,00 KM. Pravo na jednokratnu novčanu pomoć u iznosu od po 200 KM priznat će se za svako novorođeno dijete, ukoliko bar jedan od roditelja ima prijavljeno mjesto prebivališta na području općine Ilidža duže od godinu dana, a i za porodilje koje imaju status raseljenog lica i boravak na području ove općine.

Za juli mjesec putem Službe za rad, socijalna pitanja, zdravstvo, izbjeglice i raseljena lica isplaćena je naknada za porodilje iz radnog odnosa za njih 337, što iznosi 139.067,00 KM.

Za porodilje koje su evidenciji Zavoda za zapošljavanje i to njih 285 isplaćena je naknada, što iznosi 58.279,00 KM.

Putem ove Službe 373 djece do 15 godina je ostvarilo zdravstvenu zaštitu, 80 raseljenih lica, 62 korisnika civilnih žrtava rata, 289 lica koja imaju više od 65 godina i 229 osoba koje su u stanju socijalne potrebe.

Za mjesec juli isplaćen je za 1408 porodica dječiji dodatak putem ove Službe. Od toga 2073 djeteta ostvarila su "obični" dječiji dodatak u iznosu 44,10 KM, a 697 djece uvećani dječiji dodatak u iznosu od 66,19 KM.

Svi korisnici dječijeg dodatka dužni su od 01. septembra do 31. oktobra 2019. godine obnoviti dokumentaciju kako bi nastavili ostvarivati pravno na dječiji dodatak.

## Prijem za dvije hafize Aišu Kurgaš i Mubinu Suljić

Načelnik Općine Ilidža prof.dr. Senaid Memić 18. septembra 2019. upriličio je u svom kabinetu prijem za dvije učenice koje su uspješno položile hifz, Mubinu Suljić i Aišu Kurgaš. Tom prilikom načelnik je uručio i novčanu nagradu po 1000 KM.

"Kažu da oni koji napamet nauče Kur'an nisu bas obični ljudi, uvijek su stepen ispred nas, čak i ne stare, već stalno uče i nadam se da će ove lijepe djevojke nastaviti plemenitu misiju u čitavom svom životu. Ponosan sam što sam dvije lijepe, pametne djevojke danas ugostio, a vi nastavite učiti i ne samo vjerski već u svakom segmentu života napredujte. Njeguajte svoje znanje kao i sve lijepe društvene norme" rekao je između ostalog načelnik Memić.

Suljić i Kurgaš izrazile su zahvalnost načelniku Memiću koji je jedini u Kantonu Sarajevo prepoznao njihov trud i nagradio.



## Četvrti međunarodni festival "Čuvari tradicije"

Četvrti međunarodni festival folklor za djecu i mlade "Čuvari tradicije" trajao je od 31. jula do 05. augusta 2019. godine.

Na ovogodišnjem festivalu predstavilo se više od 500 učesnika iz sedam zemalja među kojima su predstavnici Albanije, Crne Gore, Hrvatske, Bugarske, Grčke, Srbije i BiH. Organizator ovog festivala je Udruženje za očuvanje tradicije i razvoj kulturno-umjetničkog stvaralaštva „BAŠLIJA“.

Učesnici su pored koncertnih sadržaja imali priliku da obišu i kulturno-historijske spomenike, turističke ljepote i potencijale Ilidže, Sarajeva, Zenice, Konjica, Jablanice, Travnika, Jajca, Mostara.

„Ovim projektom, osim što smo našim sugrađanima i istinskim zaljubljenicima u tradiciju i folklorno stvaralaštvo priredili veoma zanimljiv i raznovrstan program kroz pet koncerata u pet gradova, mislim da smo dodatno ojačali međunarodnu saradnju, otvorili vrata i puteve za uzvratne posjete. Svemu tome doprinijeli su oni bez kojih ovaj festival ne bi sijao tako velikim sjajem a to su Općina Ilidža, Ministarstvo kulture i sporta Kantona Sarajevo i Federalno ministarstvo kulture i sporta koji su finasijski podržali ovaj projekat, stoga im se najsrdačnije zahvaljujem u lično ime i ime svih učesnika“, kazao nam je Džemo Hurić- predsjednik udruženja „Bašlija“ i direktor festivala.

Koncerti su održani na Ilidži, Konjicu, Zenici, Jajcu i Mostaru.







## Bajramski tradicionalni turnir u sjedećoj odbojci

Sedmi bajramski tradicionalni turnir u sjedećoj odbojci u organizaciji Odbojkaškog kluba invalida "Općina Ilidža" održan je 25. augusta 2019. godine u "Petoj osnovnoj školi" Ilidža-Sokolovići.

Na turniru pored ekipe domaćina, učestvovali su dugogodišnji sportski prijatelji ekipe SID "Igman" Hadžići, OKI "Kakanj 92" Kakanj i KSO "Bosna" Zenica. Pobjednik turnira je bila ekipa Odbojkaškog kluba invalida Općine Ilidža, drugo mjesto OKI "Kakanj 92", dok su treće mjesto podijelile ekipe SID "Igman" Hadžići i ekipa KSO "Bosna" Zenica. Dodjela priznanja i pehara za sve učesnike turnira i kulturno zabavni program održana je u restoranu "Izvor Bosne" d.o.o. Ilidža.



## Akcija čišćenja Hrasnice

U organizaciji Ekološkog udruženja Aleja sa partnerima projekta „Čistoća je zdravlje nas i naše djece“, omladinom džemata Kovači Hrasnica i učenicima Četvrtne gimnazije Ilidža, članovima teretane Željezna generacija Hrasnice 21. septembra očišćena je Hrasnica.

Vrijedni članovi čistili su centralni dio Hrasnice, odnosno zelene površine, parkinge, plato i okolinu Doma kulture Hrasnica, autobuske stanice, okolne dijelove škola i vrtića Radost. Akciji su se priključili i vijećnici iz Hrasnice Dino Hadžić i Amar Uzunović.

Skupljena je značajna količina otpada koja je odložena pored kontejnera za smeće po dogovoru KJP RAD koje je prevezeno na određeno mjesto.



## Izviđači s Ilidže pobjednici Dana prijateljstva Vareš

Članovi Odreda izviđača "Vrelo Bosne-Ilidža" osvojili su prvo mjesto na Međunarodnom takmičenju "Dani prijateljstva Vareš 2019.godine" u kategoriji starijih izviđača i planinki u konkurenciji 43 takmičarske ekipe. U kategoriji mlađih izviđača i planinki drugo mjesto osvojili su članovi Odreda izviđača "Igman 92" Hrasnica, dok je u kategoriji poletaraca i pčelica prvo mjesto pripalo članovima Odreda izviđača "Rakovica 9" Rakovica.



## Prijem za članove Ski kluba "Ilidža"

Načelnik Općine Ilidža prof.dr. Senaid Memić upriličio je 18. septembra prijem za članove Skijaškog kluba "Ilidža" koji su već drugu sezonu pobjednici u alpskom skijanju u sezoni 2018/2019. godine.

"Čestitam vam na rezultatima. Ovo je skup sport koji razvija hrabrost, odvažnost, želju za uspjehom. Drago mi je što ste postigli ovakav rezultat i ponosan sam vašim uspjehom", izjavio je načelnik Memić, te im uručio i novčanu nagradu u iznosu 2.000 KM.

Avdija Holjan, predsjednik Ski kluba "Ilidža" zahvalio je načelniku Memiću na pomoći koju pruža klubu i uručio mu zahvalnicu.

Prema Holjanovim riječima Amar Hamidović, Daut Hamidović, Tarik Zuhrić, Ina Liki, Tarik Kadić, Alija Bećirbegović, Muhamed Huseinović, Esma Behrić, Aldin Hamidović, Sajra Čuljević i Merjem Čuljević su imena koja će zasigurno biti poznata u svijetu skijanju.







## Fetahović, Jež i Bošnjak osvojili zlato

**P**ojedinačno prvenstvo BiH u boksu za seniore održano je 27. 28. i 29. septembra 2019. godine u Kulturno-sportskom centru Ilidža uz učešće 20 klubova, a bokseri kluba Ilidža osvojili su tri zlatne medalje. Medalje su osvojili Adem Fetahović (u kategoriji 69 kg.), Ali Jež (75kg) i Džemal Bošnjak (91 kg).

Ali Jež je proglašen za najboljeg boksera prvenstva. Još jednom su sportisti iz Bokserskog kluba Ilidža pokazali da su najbolji bokserski klub u BiH.

## Festivalsko ljeto na Ilidži

**N**a radost mnogobrojnih stanovnika općine Ilidža Sarajevo Film Festival i Općina Ilidža i ove godine realizirali su zajednički projekat festivalskog programa na području ove općine. Ovogodišnje projekcije Sarajevo Film Festivala mogle su se pogledati u prostoru nekadašnjeg kina Igman na Ilidži, od 16. do 23. augusta 2019. godine. Karte za djecu košale su 3 KM, a za odrasle 5 KM. Generalni pokrovitelj je bila Općina Ilidža. Program 25. Sarajevo Film Festivala na Ilidži počeo je 17. augusta, dječijim filmom "Fudbaleri", a za odrasle filmom "Diego Maradona", o ikoni svjetskog fudbala, a čiju režiju potpisuje Asif Kapadi. Gledaoci su mogli uživati i u filmu "Sin" čiju režiju potpisuje bh rediteljica Ines Tanović.



## Održan treći Rock Fest Ilidža

**U** Kulturno-sportskom centru Ilidža 20. i 21. septembra 2019. godine održan je treći Ilidža Rock Fest. Organizator YU Café je i ove godine pripremio program koji je bio izuzetno posjećen. Prva noć IRF-a na veliku radost ljubitelja rock muzike protekla je u odličnoj atmosferi za koju su bili zaduženi bendovi Srce, Individua, Foxy Head, Radarska kontrola, Anchy & Moondogs te ProRocksi. Drugi dan održana je besplatna škola gitare koju je vodio Toni Lović, gitarista Zabranjenog pušenja, a potom i škola bubnjeva s Amarom Češljarem na čelu. Sam vrhunac večeri je bio nastup slavnog benda Zabranjeno pušenje. Organizatori su zadovoljni festivalom koji je već postao tradicija na Ilidži, te obećavaju da će naredni biti još bolji i sadržajniji.







## Održan turnir "Ilidža Volleyball Cup 2019"

Ilidža je bila centar ženske odbojke u BiH 14. i 15. septembra 2019. Održan je dvodnevni turnir "Ilidža Volleyball Cup 2019", osmi po redu, a ove godine bio je u znaku obilježavanja 40 godina od osnivanja ŽOK "Igman" Ilidža. Pokrovitelj turnira je Općina Ilidža. Na do sada najbrojnijem učestvovalo je šest ekipa: prvaci i vice-prvaci BiH, OK Jedinstvo Bimal Brčko i BL Volley Banjaluka, premijer ligaš OK Goražde, OK Slavija Istočno Sarajevo te superligaši OK Ilijaš i domaćin ŽOK Igman. Prvog dana u dvorani Kulturno-sportskog centra "Sabit Hadžić" odigrano je šest utakmica po grupama a drugog dana tri utakmice za konačan plasman. Tako su na turniru odbojkašice ŽOK Jedinstvo Bimal Brčko zauzele prvo mjesto. Druge su bile OK BL Volley Banjaluka, dok je treće mjesto pripalo ŽOK Igman Ilidža. Odbojkašice OK Ilijaš bile su četvrte, OK Goražde pete a šeste su OK

Slavija Istočno Sarajevo. Na svečanom proglašenju pobjednika uručeni su pehari za prve tri ekipe i zahvalnice ostalim učesnicima, a proglašena je i najbolja igračica turnira po pozicijama Amira Husić igračica i kapiten višestrukih prvaka BiH Žok Jedinstvo Bimal i dugogodišnja reprezentativka BiH. Prilikom svečanosti otvaranja turnira prisutnima su se obratili predstavnici kluba i dosadašnji selektor ženske odbojkaške reprezentacije Goran Nešić, a turnir je otvorio pomoćnik načelnika Denis Muhović. Prilikom ceremonije uručene su posebne nagrade za razvoj odbojkaškog sporta na Ilidži Jovici Tošiću i Adnanu Muzuru i plakete povodom jubileja kluba Općini Ilidža, te doskorašnjim članovima uprave Behki Dokara i Muameru Delaliću. Uručeni su pokloni igračicama ŽOK Igman koje su prestale sa aktivnim igranjem: Naidi Smajić, Bedri Delalić i Amni Dokara.